

1277 ritimæ illius oræ accolæ Venetorum studiosissimi per id tempus habebantur, ab imperio defecerunt. Ad eos in fidem retrahendos Andreas Bafejus cum ingentibus copiis mittitur. Illi vero, ubi terra marique omnia Venetis armis circumstrepere cœperunt, ad Aquilejæ Antistitem in Carnos mittunt: orant ut pro mutua amicitia finitimæ civitati ferret opem, arma compararet, Venetum minaciter imminentem a sua ceruice depelleret. Motus ille his precibus tumultuarium militem conscribit, conscriptum Tergestinis ferre opem jubet. Freti his auxiliis Histri Venetum ab obsidione multis conatibus student avertere; sed parum illis aut suæ aut externæ opes profuere: victi bello in fidem coacti sunt redire. Rainerius Maurocenus ad eos in fide continendos in provinciam est missus.

1276 Defunctus Histrico bello Venetus Anconitanum bellum proxime excepit, ac nescio an hoc quoque sit cœptum, antequam illud depositum: ita omnia in annalibus, quos sequimur, perplexa hoc loco traduntur, ut quid potissimum affirmem non habeam. Cæterum paucissimi quidem Anconitani hujus belli mentionem fecere: ii vero in quibus id relatum invenio, tradunt Anconem a Venetis, Joanne vicesimoprimum Pontifice, oppugnari cœpisse: cujus brevis Pontificatus in primum Contareni Ducis annum incidit. Suscepti belli causam fuisse affirmant, legem de portoriis paucis ante annis latam: cujus antiquandæ quum Gregorium Pontificem auctorem facere quæsiuissent, essetque tum primum res parum fœliciter mota, multa occulte, ut fraudem legi facerent, & in Histricum sinum, & circa Padi ostia invexerant. Eam rem indigne ferentes Veneti (constabat enim sua patientia Anconitanos in dies insolentiores fieri) sex & viginti triremes expediunt.

1277 Additæ onerariæ quædam ad commeatus, machinas, aliaque ad urbis oppugnationem necessaria devehenda. Sed prius, quam hæc pararentur, crediderim repetitas fuisse ab Anconitanis res, nec redditas. Cœpit Venetus sub ipsum appulsum portum oppugnare: unde repulsus, quum classis nullam circa urbem tutam haberet stationem, nec interim in anchoris staret, fœdissima tempestate arrepta, non mediocriter proximis est littoribus conflictata: sex triremes Senogalliæ scopulis